

Nunatta avataanniit timmisartukkut Kalaallit Nunaannut angalanermi piumasaqaatit pillugit Namminersorlutik Oqartussat nalunaarutaat (Immikkoortoq 1)

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20 12. november 2001-meersumi, Nappaatit tunillaassortut akiorniarlugit iliuutsit pillugit Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a, 12 a, 12 b, 12 c, 21 a aamma 21 b aamma § 29 imm. 2 malillugit aalajangersarneqarpoq:

Nunami oqartussaaffigisami atuuffii

§ 1. Nalunaarut Kalaallit Nunaata nunataani atuuppoq.

Atuuffiata killilerneqarnera

§ 2. Inuit Savalimmiunit imaluunniit Islandimit Kalaallit Nunaannut angalasut aamma Kalaallit Nunaannut aallarnissaq sioqqullugu ulluni 14-ini kingullerni Savalimmiuniissimasut, Islandimiissimasut imaluunniit Kalaallit Nunaanniissimasut §§ 5-mi, 6-mi aamma 8-mi ilaatinneqanngillat.

§ 3. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutinneqassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatsinni Nakorsaaneqarfik imm. 1 naapertorlugu aalajangiisassaaq.

Imm. 5. Inunnut imm. 2-4-mi taaneqanngitsuni sulisunut, Nunatsinni Nakorsaaneqarfik imm. 1 naapertorlugu aalajangiisassaaq. Tamatuma saniatigut Nunatta Nakorsaaneqarfia qinnuteqarnikkut inunnut inuiaqatigiinnut pingaarutilimmik sulialinnut § 8-mit immikkut akuersissuteqarsinnaavoq.

Imm. 6. Nunatsinni Nakorsaaneqarfiup nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut atuutinneqassanngitsut aalajangersinnaavaa.

Imm. 7. Angalasut laboratoriami nakorsaanermit akuerineqartut ilaanni Covid-19-imut akiuussutissanik

misissortinneqarsimanerminnik uppersarsarsinnaappata §§ 6, 8 aamma 9-mit mininneqarnissaannik Nakorsaaneq aalajangiisinnavaq. Angalasut aallarnissaq sivikinnerpaamik ullunik tallimanik sioqqutsillutik uppersarsaatissanik nakorsaanermit nassiussissapput. Immikkut akuersissuteqarnissaq akuersissutigineqarpat qinnuteqartoq aallartinnani allakkatigut uppersarsaammik nakorsaanermit tunineqassaaq.

Imm. 8. Meeqqat 12-t inorlugit ukiullit §§-ni 6-imi aamma 9-mi ilaatinneqanngillat. Meeqqat 12-t inorlugit ukiullit ingiaqataasorlu § 8-mi aalajangersakkat malissavaat.

Sapaatip akunneranut Air Greenland aqutugalugu avataanniit tikissinnaatitaasut amerlanerpaaffiat

§ 4. Coronamut allattoqarfik Kalaallit Nunaannut Air Greenlandimut ilaallutik sapaatip akunneranut amerlanerpaat tikissinnaasut pillugit Air Greenlandimut nalunaaruteqassaaq.

Timmisartortitseqatigiit allat assigisaallu nunatsinnut angalatitsisarnerannut piumasaqaatit

§ 5. Timmisartortitseqatigiit allat assigisaallu, Air Greenlandimut, Kalaallit Nunaannut millutik timmisartukkut angallasserusuttut Kalaallit Nunaannut angallassinissamut Corona pillugu allatseqarfimmik qinnuteqassapput.

Timmisartumi Kalaallit Nunaannut mittussami ilaasunut piumasaqaatit

§ 6. Angalasut Covid-19-imik nappaateqannginnerminnik uppersarsaammik takutitsisut kisimik timmisartumut Kalaallit Nunaannut mittussamut ilaaqqusaapput. Oqaaseqatigiit siulliit maleruarneqarnissaat timmisartortitseqatigiiffigit akisussaaffigaa.

Imm. 2. Covid-19-imik misissortinneq napparsimmavimmi peqqissaavimmiluunniit allaniluunniit Nunatsinni Nakorsaaneqarfiup akuerisaani ingerlanneqarsimassaaq.

Imm. 3. Covid-19-imut misissortinnermut piumasarineqartut Nunatsinni Nakorsaaneqarfimmit aalajangersarneqartut naammasineqarsimassapput.

Imm. 4. Nunatsinni Nakorsaaneqarfik imm. 1-imi aalajangersakkanik malinninnginnissaq pillugu aalajangersaasinnavaq.

Avataanniit angalasut nalunaartussaataitaanerat

§ 7. Angalasut Immersugassaq Sumut-mik immersuisimasut kisimik timmisartumut Kalaallit Nunaannut mittussamut ilaaqqusaapput. Angalasut Immersugassaq Sumut-mik immersuisimanermit nassiussisimanermullu uppersarsaammik timmisartumi sulisumut takutitsissaaq. Oqaaseqatigiinni siullermi aappaannilu taaneqartut maleruarneqarnissaannut timmisartortitseqatigiiffik akisussaavoq.

Kalaallit Nunaannut tikereernermit malitassat

§ 8. Inuit timmisartukkut Kalaallit Nunaannut tikittut Covid-19-imik tunillanneqarsimannginnertik uppersarsaqaarnagu aqqissuussanut, nalliuttorsiornermut, sammisaqartitsinermit assigisaanulluunniit

peqataaqqusaanngillat. Matumani illup iluani, silami, pisortat inuillu katerittarnerat, aaqqissuussinerit pisussallu il.il. pineqarput.

Imm. 2. Pisortat suliffeqarfiutaanni assigisaannilu isersimanermut, inuussutissarsiortut inigisaanni tamanut ammasuni isersimanermut aamma pisortat namminersortullu utoqqarnik paaqqinnittarfinut napparsimmavinnulluunniit isersimanermut inerteqqussut aamma atuutinneqassaaq. Taamaattoq ulluinnarni nioqqutissanik pisiniarnerit allatullu pisariaqavissumik pisiniarnissat allanit isumagineqarsinnaanngitsut isumaginissaat akuerineqarput.

Imm. 3. Peqataasut taamaallaat inoqtugiiuppata imm. 1 inissiamut atuutissanngilaq.

Imm. 4 Imm. 1 aamma 2 katersuunnernut politikikkut allatulluunniit isummersornissamik siunertalinnut atuutinngillat.

§ 9. Inuit § 8-mi pineqartut Kalaallit Nunaannut tikereernerup kingorna ullut tallimassaanni kingusinnerusukkulluunniit Covid-19-imik napparsimanermut misissortissinnaapput.

Imm. 2. Misissuinermi nappaammik nassaartoqanngippat misissorneqartoq Covid-19-imik tunillanneqarsimanngitsutut naatsorsuutigineqassaaq, taamaammallu § 8-mi inerteqquteqarnermut ilaanani.

Imm. 3. Misissuinermi nappaammik nassaartoqarpat inuk pineqartoq tamanna pillugu malittarisassat nalinginnaasut malillugit katsorsarneqalissaaq, takuuk Nappaatit tunillaassortut akiorniarlugit iliuutsit pillugit Inatsisartut peqqussutaat.

Imm. 4. Inuk Covid-19-imik nappaateqarnermut misissortinngippat § 8-mi inerteqqut Kalaallit Nunaannut tikinnermiit ulluni 14-ini atuutissaaq. Inuk Kalaallit Nunaannut tikinnerminit ullut 14-it sinnerlugit Covid-19-imik nappaateqarnermut ersiuteqarsimanngikkuni Covid-19-imik tunillanneqarsimanngitsutut naatsorsuutigineqassaaq.

Imm. 5. Inuk Kalaallit Nunaannut tikinnerminit ullut 14-it kingorna Covid-19-imik nappaateqarnermut ersiuteqaruni tamanna pillugu malittarisassat nalinginnaasut malillugit katsorsarneqalissaaq, takuuk Nappaatit tunillaassortut akiorniarlugit iliuutsit pillugit Inatsisartut peqqussutaat.

Pineqaatissiissuteqartarnerit

§ 10. §§ 4 aamma 5, § 6 imm.1 aamma §§ 7 aamma 8-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilerfia

§ 11. Nalunaarut 7. juli 2020-mi atuutilissaaq.

Imm. 2. Nalunaarut malillugu killilersuinerit, inerteqquteqarnerit, peqqusinerit il.il. 20. juli 2020 tikillugu atuutissapput.

Namminersorlutik Oqartussat, ulloq 3. juli 2020

Anna Wangenheim

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut